

四庫全書

集部

欽定四庫全書

鳳池吟稿卷六

明 汪廣洋 撰

七言長律

上壽


節鉞專征握帝符，東南黎獻望來蘇。
長驅白日浮雲淨，直掃滄江積翳無。
紫極高秋逢電繞，彤霞清曉聽嵩呼。
諸侯玉帛承筐篚，殊譯河山入版圖。
五福載陳昭往昔，百男重頌溥歡娛。
不期赫赫銘彝鼎，况乃乾乾究典謨。

虛席每延多士語解衣終見遠人孚周家仁厚流芳盛
端與明時作範模

大祀園丘喜甘露降應制

至節園丘祀顯穹先期法駕幸齋宮山紆紫氣排雙闕
日射紅雲擁六龍八表清明羣動喜一誠感格百靈從
露垂甘液凝珠顆松偃香蕤合翠幪凡物均霑神物化
天心允與帝心通絕勝寶甕陳終夕奚待金莖倚半空
漢苑醴泉非肯美梁園瑞雪謾形容小臣際遇承恩澤

涓滴何能答九重



鳳池吟稿卷六

欽定四庫全書

集部

鳳池吟稿卷七至九

詳校官中書_臣呂光復

中書_臣劉源溥覆勘

總校官中書_臣朱鈞

校對官中書_臣牛稔文

謄錄監生_臣沈世玫

欽定四庫全書

鳳池吟稿卷七

明 汪廣洋 撰

七言律詩

范蠡廟

越王去國將危日
范蠡歸心用計時
千古君臣難再遇
百年耆老尚興思
空簷暮雨巢乾雀
遺廟春風哭子規
惟有西施灘下水
浪聲東向不勝悲

讀吳越春秋

口血纔乾又復讐總無誠意為東周夫差只愛容狂佞
勾踐殊能用智謀檣李郡還與土廣姑蘇臺就鹿麋遊
高情獨羨陶朱子萬頃滄波一葉舟

姑蘇臺有感

丙午秋大軍圍蘇州余奉
命計議軍務感而賦此

何事夫差日漸淫都將興廢付登臨霸圖反手歸嘗膽
醉魄流涎屬捧心臺土尚存芳草合鹿麋空卧古苔深
唯應胥口波濤急百折東流感至今

夜過江州偽漢故都

此地當年建翠華，歌鐘雲沸五侯家。
眼前誰是池中物，身後徒為井底蛙。
午夜長風催桂檝，滿江明月浸蘆花。
琵琶哀怨今安在，惟有荒城寄宿鴉。

泊舟左蠡寺

王師與偽漢戰于此

鳴鴈嗷嗷集野田，白沙如雪照行船。
秋風一阻經三日，客子重遊已二年。
左蠡碧流烟雨外，匡山青落酒杯前。
空林老衲猶思治，解說王師奏凱旋。

送魯志敏往番陽兼諷諭吳德廣

江左誰為保障臣感時臨別重敷陳蘭陵大饗千秋祀

越國終全六郡民莫倚峻關嚴虎豹好圖高閣畫麒麟

燈前預擬旋歸日聯轡鶯花二月春

陳霸銳歸陳為蘭陵太守汪華歸唐

封越國公皆歛人也廟食俱存

豫章中秋

丹桂吹香玉宇寒緒風如水月如盤空傳許遜驂黃鵠
不見文簫逐綵鸞樂奏廣庭雲外落山連章渚鏡中看
賓筵有酒君當酌莫待秋霜滿鬢端

初夏

紈扇盈盈剪越羅
麥秋時候轉清和
雲飛城郭烟中遠
星散漁家水際多
小樹暮天收白蠟
平蕪晴日放新鶻
南州高士亭前客
尤愛滄浪第一歌

和子常趙聘君詩韻

聖人予奪嚴書法
曾托春秋二百年
世道久嗟鳴鳳後
王綱深著獲麟先
閉門纂述無虛日
直筆光華動燭天
還憶低頭拜東野
紫陽山色落窻前

癸卯秋大軍圍武昌予極欲一登黃鶴樓不數
日復命還建業莫遂所懷乃賦七言以寄予興
武昌城頭黃鶴樓爽塏迴挹西南州岿江岷江於此合
古人今人無限遊天際一帆懸宿雨雲邊萬木下高秋
賦詩橫槊慷慨事笑指闌干近斗牛

雨晴

護龍河頭春雨晴黃鳥白鳥相兼鳴重來高閣寓幽目
一望故園銷客情野花暮麗照江浦官樹依微繞石城

想見六朝全盛日紫宮樓觀碧雲橫

召赴京師別豫章

天子圖全念用兵國公承命任專征

丁未年信鄂二國公平山東

不

煩麾下驅馳日已定山東七十城自古廟堂求勝算只

今河洛遂歡迎小臣愧乏旬宣力願竭愚衷答聖明

五年三復被綸音倚注唯專感激深

甲辰冬開諭蕪州丙午夏以中書叅

議召還是年冬叅議西省戊申夏月開省山東又名故詩中并紀之充國豈疎屯塞策馬

周終許報君心風雲際會成今古日月昭融實鑒臨歷

歷楚山遙在目壯歌明發大江濤

贈劉秀才歸理鄉校

江浦風高木落稀江天雲濶鴈飛遲
正憐張翰思歸日況值文翁領校時
左蠡廟前山隱隱宜春臺口柳依依
經行得意多題詠莫惜鸞牋寄鳳池

趙待制致仕還會稽

新開湖水水如雲三十年前憶見君
京國相逢增感舊辟雍長得細論文
白頭喜喜遂林泉約紫誥欽承雨露恩

遙想到家尋賀老泊船來去棹晴曛

宋景濂承旨致仕還金華

力操鉛槧代橐鞬贊翊無如子獨賢壁水屢游來後學
瀛洲高步領羣仙乞歸際遇明良日近侍從容二十年
况有兒孫能繼武鳳凰池上羽毛鮮

中車久不到潛溪溪上貧簞箇箇齊玉檢金封勞紀述
石田茅屋稱幽棲賀公共喜榮歸老疏傳誰言早見幾
此去東南形勝處知君一一有新題

贛上

兩江流出萬山溪，雲霧蒸蒸動鼓鼙。
沙暖迴回鴻雁到，草青偏有鷓鴣啼。
霜餘榕葉凋何晚，雪裏梅花綻已齊。
物候固殊聲教遠，會詢蠻獠及雕題。

錢博士致仕還會稽贈別兼東趙待制

翰林待制近辭老，國學博士今旋歸。
二賢出處不易得，

自注同名至京同年告老 一代文章屬有為，
祖席都門羅餞禮，大鏞

東序足生輝。若耶溪上春如海，
詩筆還當對客揮。

題宋徽宗寒江歸棹圖

怪石竒花擁汴都上皇行樂在蓬壺不將深慮防侵侮
却把閒情托畫圖野艇風高晴雪重江天水濶暮雲孤
斷鴻一去無消息啼殺延秋頭白烏

韓國公曹國公暨中山侯等官奉旨詣嶽鎮海
瀆行報祀禮早朝賦詩呈別

天仗初齊曙色分笏班玉立候金門國家報祀循常典
海岳儲祥表厚坤龍篆重緘雲外去鳳韶九奏月中聞

此行端為道幽顯倚注唯應屬老臣

嶺南殘臘遣懷

一麾長憶出南京萬里車書載筆行
驛路通關疑隴蜀人家瀕海似蓬瀛
三冬地暖花爭發半夜雞鳴潮又生
公館莫言岑寂甚草虫啾唧到天明

題清遠峽飛來寺

峽裏金銀佛寺開老僧傳是昔飛來
菩提子落雲間石
蒼筍香飄月下臺江湧靈源通海嶠
山橫古翠接蓬萊

願詢往事觀碑刻閒向松陰掃綠苔

舟次橫石贈同行崔檢校陳宜武

嶺外將軍如虎貌插旌撾鼓錦征衣夕陽在船客未醉
春水滿江魚自肥歸路遠趨丹闕寸心長逐白雲飛
笑歌歷覽思何愜兩岸鳥鳴深翠微

赴召留題英德驛

英德縣前多好山山峯擁翠出雲間人家星散盜賊少
官舍日長文字閒江水春容涵夕景岸花紅白帶春殷

愧無宋璟匡時策也自交州奉召還

再過曲江九成臺有感

聞說重華巡狩日六龍遙駐九成臺山川高下難為險
風氣淳龐自此開渺渺蒼梧雲在望嗷嗷丹穴鳳曾來
令人不盡懷思處一道澄江碧似苔

楊瀾阻風夜坐

北風吹浪阻歸舟偶為楊瀾數日留几席清寒生薄暮
江湖長夏即深秋天低星斗光芒出月暗魚龍自在遊

坐待平明攀曲磴遠從匡阜望神州

答西域班右丞詩韻應制

聞君遠在底羌北露宿風飡志不磨老去豈忘思故里
悲來惟復動高歌三冬沙磧層冰烈六月天山積雪多
對此何為甘寂寞聖明人物正蒐羅

答右大夫陳靜齋詩韻

夔龍接武會風雲珍重麒麟閣上人經國正期行素志
讀書端不事虛文交遊有道陳雷在公論無私賈董存

預擬暮年尋舊約草堂下近浣花村

題日本畫扇應制

戎裝兩兩控驂騮沙瀨風高碧海頭畫袴輕衣馳白日
雕弓長箭射清秋軍容炫耀爭先出地勢縈迴取次遊
保守固知宜講武當思安集在和柔

又

騶從如雲列滿塗囊盛橐載走誼呼信知島嶼多殷富
故擬丹青入畫圖海底珊瑚光耀出松根琥珀等閒無

緬懷楚國何為寶珍重遺編作範模

鑿輿春日幸鍾山寺

道林靈刹擁祥光法駕來臨日載陽
五色雲中環霧旆
萬年枝上發天香風傳鳴鳥笙竽合
石蔭垂蘿紫翠涼
擬對明時歌勝事愧無詞賦續班楊

題鍾山勝景應制

北山佳氣鬱葱葱高處深藏七佛宮
松下鷗眠無客到
洞中龍出有雲從茶煎紫荀逢支遁
藥煉丹砂羨葛洪

更欲躡鳧凌絕巘扶搖大塊鼓雄風

中秋寫懷兼柬諸省幕再用過字韻

爛醉新豐市上過馬周豈意有常何中朝自古徵求重
諸老於今際遇多病起風流殊不減詩成鬚鬢定應皤
東南餽餉蒙恩賜強欲行聞擊壤歌

又

玉門關外笑談過百戰寧論萬里何定遠收功誰得似
樓蘭遺類苦無多賦詩已慰三年別覽鏡曾聞一夕皤

傳道兩階千載舞豈應專羨大風歌

關中懷古

駐車豐邑鎬池東想像周家帝業隆
紫鳳碧梧棲正穩朱絃清廟奏何工
分藩終擬蠻畿服治象初懸魏闕崇
習俗更聞勤稼穡只今誰不頌豳風

又

繚繞阿房觀闕崇旌旗五丈建當中
萬人曾和千人唱一世焉知二世終
水落石鯨埋碧草露寒金狄泣秋風

酒池炙樹皆塵土無復離宮複道通

又

未央宮殿七年成武庫宏開列繡楹高祖不忘嘗苦戰
鄴侯終欲厭羣情平籠鳳闕當秦嶺覆鯨波撼渭城
後世莫加難逆料建章纔就又承明

又

唐宮聞說是隋宮一竭勤勞一享功始信經營能取儉
後來締構轉為工翔鸞棲鳳連雲表拾翠承香結綺同

風景不殊朝市變短沙零亂語秋蛩

偕王伯安登凌歊臺

客子不樂登江臯江上古臺百尺高雲深輦路竄雀鼠
藤蔓翠壁愁猿猱已聞紫皇駐玉節况乃白日來秋濤
罷歌撫劍下臺去松樹滿山啼伯勞

答曹秀才

曹君與我近相得還可訪我西城陰固知把臂即為友
最喜識面能論心彈琴屢愛白日靜酌酒一笑青春深

況復牀頭有珠玉寄聲愧乏雙南金

夜泊昌邑逢程照磨

兩年不見程廣陵一見照人眉宇青
念亂每嗟魚雁隔談詩還喜蛟龍聽
白門酒好不易得昌邑山多曾屢經
夜分舟子忽長往令我相憶愁復醒

病中次陳檢校見寄韻

茂陵客子怕逢秋百歲長懷千歲憂
六代雲山歸老眼一江烟水送羈愁
西風古調誰家遠落日輕帆何處舟

莫向鳳凰臺畔立碧梧鳴鳥不勝幽

東湖把酒看明月勝會於今有幾人鄉國已非前日富
乾坤空寄一身貧竹西歌吹經年斷江上尊罍入夢頻
偶向建龍關北望碧雲秋樹擁儀真

題胡子徵春暉堂詩卷

三月好風江上歸心旌長共白雲飛輕舟晝泊慈母廟
芳草煖薰遊子衣呼名杜宇為誰泣入饌鯉魚空自肥
無復登堂拜家慶祇慚對爾歌春暉

答友人軍中詩韻

石城清旦發蒙衝，龍虎旗開劍戟雄。
鶚渚瘴烟終見掃，吳門佳氣亦何隆。
曹瞞勢迫須臾際，宋祖功歸指畫中。
會擬勞還行大賚，百川成酒吸長虹。

樓船江上馭颶輪，豈但西南解戰塵。
錦幟插天分列霧，鐵衣環日燦披銀。
襄樊只合歸王土，雅頌終當賦蓋臣。
幕下從官誰得意，陳琳草檄最清新。

倚天長劍砍袂星，排斥風雲氣愈精。
四海正思來鳳鳥，

一軍深喜詠倉庚
澄江白日傳飛艦
伐鼓鳴鉦撼列營
想到匡廬延五老
功成應解乞長生

廣陵懷舊

官柳陰陰鎖汴橋
暖催晴綠上蘭橈
花吟后土依然在
人去東風不可招
紫陌漸稀春試馬
青樓殊絕夜鳴簫
回看烽火連雲起
應使江淹笑寂寥

贈丹陽令白謙

曾聞李白遨遊地
多在雲陽古縣中
詩筆夜題丹井月

酒船晴棹練湖風人家隔水深深見驛路看花處處同
今日官遊非昔日野蒿烟草蔓晴空

寄權都事

憶昔池頭倡和詩相逢曾是去年時每慚司馬恒多病
不及揚雄善屬辭積雨山城凝悵望青春幕府重論思
想應珂珮珊珊日芍藥當階午影遲

中夜寫懷寄歙郡諸老

凍墨團鴉賦未成松堂重掩不勝清天寒鸚鵡聞孤寂

月黑蝦蟇報二更擁篲正須諸閣老投簪休擬羨門生
朝陽無限梧桐樹丹鳳何如為一鳴

使歛諭番陽

五嶺蒼蒼劍插天肩輿高下似乘船殘年止有二十日
沽酒豈無三百錢野碓暝舂喧急水山樵寒雨隔孤烟
祇慚將命恒馳逐安得雄才配馬遷

到星源聞子敬王指揮得衆心且番陽有歸附
意賦詩為贈

歎山羣倚翠雲梯仰見長城堞雉齊陸抗已聞羊祜德
伏波安受子陽稽松堂夜色搖書幌板屋寒更送鼓鼙
還憶肩輿舊遊地江東形勝似巴西

奉旨詠白兔

杪樞陰裏搗靈砂不使黃塵一點加立向月中霜脫穎
行過桂底雪生花赤烏翔集非專美丹鳳來儀足並誇
解得長生保貞素潔身長近玉皇家

奉旨賦天澤潤兵渡江之初

采石磯頭一葦過遠驅雲霧逐星河九江水濶魚龍盛
萬國春初雨露多香挹旌旄紛綵色恩流草木藉光和
洗兵會值崇文教那用重賡夜宿歌

過雲屯灘

蘿月紛紛星斗高雲屯灘上聽飛濤莫傷蜀鳥多啼血
且喜吳儂慣刺篙風逆溪聲懸碧樹雨深崖氣入青袍
夜長把燭頻看鏡只恐年來變二毛

過犬牙灘

犬牙灘上浪喧豗，好似瞿塘灑瀨堆。
雲木龍葱含暝雨，石門開豁殷晴雷。
沙禽引子排船過，野獺銜魚趁水迴。
惆悵無因慰寥廓，越山相對碧崔嵬。

送唐師宗歸金華

桐樹花殘春晝遲，星源門外送君時。
到家已是三月盡，別路休辭十日期。
南省故交煩寄語，東垣遺範慎論思。
山杯縱飲終難醉，謾托長吟寫素絲。

過故宮

毀垣遺跡在烟霞麋鹿羣羣下淺沙山嶺淨銷龍虎氣
野人猶紀帝王家春風玉砌埋荒草夜月銀塘沸亂蛙
歌徹黍離情未泯小禽衝落刺桐花

別劉希敬

與君同理揚州棹卧看長天入翠微何事杜陵傷遠別
不如范蠡賦東歸春風小店梨花發宿雨疎林燕子飛
惆悵臨溪一杯酒鑿江江上日暉暉

過徽州別魏府尹

與君攜手鳳池東，題徧春階芍藥紅。
沉復雲山千里別，豈知風雨一尊同。
少陵老去憂多病，王粲年來喜事戎。
二十五灘烟水急，幾時歸棹月中。

聞鄧僉院得徽歛民心喜賦短章兼美魏知府
鄧禹經營攬俊良，魏徵匡濟事文章。
二賢往日尊伊呂，歷代於今數漢唐。
圖像星聯華閣曉，諫書春滿御爐香。
明時況喜雲仍在，列傳應知信有光。

夜坐用郭奎韻

江城子夜動悲歌海內交遊近若何愁到寒蛩啼露草
喜占乾鵲下庭柯謝安好為圖經濟王粲虛勞嘆輶軻
與子出門天欲曙馬頭斜月淡銀河

答吳左丞見寄登滕王閣詩韻并序

壬午年正月十有四日王師抵江西偽漢守
臣降附政行令肅野不釋畊市不易肆雖老
臣宿將罔敢干犯乃大會於滕王閣縱觀燈
火懽遊連夕居氓扶老挈幼出入軍旅中綽

有太平氣象余適持文墨佐戎事重念孟軻
氏所謂不嗜殺人而一旦形容於今日寧不
踴躍感激耶繼而以逆徒叛離師復壓境予
亦將命往焉綏懷之暇求向之所登滕王閣
者但見瓦礫紛披基址傾覆矣九月五日吳
左丞自臨川以詩見寄予勉強用韻仍書此
以識所見之畧云

繡閣披雲倚暮寒江城雨雪徧峯巒半空搥鼓三軍樂

五夜燒燈萬姓懽相國旌旌來隱隱筵珂珮響珊珊
重臨謾憶追遊日獨有陽春和轉難

雉堞巖巖江水頭芙蓉香淨浦雲收舊時歌舞空遺跡
此地檐帷重久留歷歷鳥鳴秋苑樹斑斑人上夕陽舟
數峯老翠簷前落想見當初帝子遊

題許旌陽祠答吳左丞韻

劍氣稜稜夜不韜混涵江水戴靈鰲至人身後勳庸在
新廟雲邊結構牢荆鄂烟氛終見掃湘潭魑魅豈容逃

春風簫管騰騰日多士瞻依莫憚勞

過褚磯有感

舳艫談笑竟成塵
兵氣憑陵尚未湮
楚霸自知空四海
炎劉誰識定三秦
渾心月黑魚龍伏
岩穴風清虎豹馴
唯有經行舊遊處
淡烟衰草重愁人

鳳池吟稿卷七

欽定四庫全書

鳳池吟稿卷八

明 汪廣洋 撰

七言律詩

過黃州有感

甲郡繁華控上流，郡中多半竹為樓。
楚茆巴橘通王貢，越管秦箏貯客游。
萬竈顛危烟久滅，幾人離散骨初收。
移船夜讀眉山賦，一鶴橫江月滿舟。

快閣

西昌傑閣連城闕勝日登臨足快哉楚嶺重遮嵐氣合
贛江遙遞浪聲來涪翁詩思排雲漢坡老詞華被草萊
欲把一尊酌明月夜深還上最高臺

使贛諭熊天瑞

舟行到贛數千里江聲瀉碧山綢繆將湮未湮斷岸出
欲雨不雨晴雲浮謝公自足平生願司馬真成汗漫遊
明日旬宣應有暇鬱孤臺上望南州

風雨舟次萬安聞贛城未附

汨汨寒江照碧蕪
陰陰官樹噪童烏
一篷風雨留行色
萬里雲山入壯圖
馬武拔身終仕漢
周瑜仗劍早從吳
閉門尊大成何事
慙媿公孫畫此謨

登鬱孤臺

傳報東門索鑰開
緩乘單騎陟層臺
連營喜動旌旗捲
遮道懽迎父老來
雲擁龍驤通百越
天垂象緯麗三台
贛江流水深千尺
願激餘波遍草萊

題瑞菊詩卷後并序

穆爾薩元之故帥也嘗仕於吳鄉種菊數百
本秋芳爛開一本有二色詩友咸作詩稱其
美余亦綴書卷末後密理公宦遊海上兵革
四起奔走南北聲問各無聞焉甲辰冬余承
王命開諭贛州乙巳春守臣熊天瑞附順兩
軍遂解入城召父老故官宣以上旨有龐眉
皓首年幾八十者立於衆人中扣其從來乃
知為密理公公亦不記余為誰何訪故篋得

詩文一軸出示於余悵然追思已二十年矣
卷中詩文名字炳然手蹟如故但不知存者
今幾人臨風拜觀涕泗交集遂賦此以紀歲

月云

我對青山倦著鞭君垂白髮賦歸田
偶來把臂三千里却憶題詩二十年
零落親朋逢亂日蕭條松菊委荒烟
臨風展玩長揮淚謾想當時思惘然

南韶

皇恩曠蕩被南陲嶺徼間關遂坦夷諭俗正詢司馬傳
觀風當見召公詩山厨和殼蒸粳稻驛路含漿食荔枝
故老不忘鄉丈德年年來祭曲江祠

遠懷

五月三日舟次雷
港復有西省之行

老親獨往京城日賤子復上西江槎菽水暫雖離膝下
關河可奈渺天涯千巖古木啼鶻鳥一路東風過棟花
遙想小兒初學語月終應是望回家

懷陳教授并序

余自甲午寓太平獲交於永嘉陳君天祥別
後音問寥絕戊申年得來書且云于湖一別
十有五載每思送舍弟子盛歸覲詩有曰朝
出乘金鞍暮入坐錦茵人生固云樂不如歸
見親此賤子遽還鄉里者誠有感於此也龍
泉楊縣丞至方知入贊皇猷出秉大政為吾
道增重如賤子父母俱亡鬢髮盡白狀如六
七十歲人言之可為於悒余披誦再四夜寤

寂然不能無感君名善前鄉貢進士

于湖春日草萋萋十五年前憶舊題
幸際盛時開幙府愧無長策及青齊
江城四月楊花過公館三更杜宇啼
念子不眠增感慨越山迢遞水雲低

過高郵有感

去鄉已隔十六載訪舊惟存四五人
萬事驚心渾是夢一時觸目總傷神
行過燬宅尋遺址泣向東風弔故親
惆悵甃湖烟水上野花汀草為誰新

荆山

即懷遠縣舊誌九澗八河旁繞此山

荆山有玉名天下玉去山存縣治幽九澗直從松頂落
八河旁繞石根流椒花委路東風歇雲氣彌空紫蓋浮
兵後可傷民物盡幾家星散住林陬

舟次塗山拜禹王廟

堯舜深嗟洙水流禹王專任八年憂力排漢泗歸溟壑
威逐龍蛇出海馭胼胝竟能安萬國衣裳端合會諸侯
小臣再拜塗山下瞻望餘光在上頭

下蔡縣

周世宗駐蹕之所

傳聞下蔡開新邑曾是當年古壽州
羣嶺坡陀圍楚野十城環瓌控淮流
風雲散盡豪華歇狐兔來遊草木稠
落日臨高倍惆悵八公山遠暮生愁

過壽州望八公山有感

八公草木晚離離彷彿成人似設竒
老氣逼雲含霧雨空青拔地鎮淮夷
謝玄歸奏平戎日王猛徒勞料敵時
淝水不關興廢事夕陽西下浪聲遲

太和縣

淮河西與蔡河接八百里程無一家廢邑經年埋草莽
遺民何處夢桑麻蟬聲嗚咽沿堤柳狼跡縱橫匝路沙
唯有傷心舊時物毀垣高倚夕陽斜

許家窩

兩隄削立數千仞坡脚繞晴見曝黿河水到灣喧去馬
權郎牽纜走驚猿桑畦不辨蘆花渚麥隴翻成祗樹園
若比春陵凋瘵處許家窩上更難言

霸王城

重瞳往昔矜無敵故壘於今只有名大抵喑鳴非帝德
由來寬厚合民情皇風已蕩妖氛氣陰雨猶聞鬼哭聲
念此膏腴淮楚地幾時田畯勸農畊

黃河

曹州抵濟寧周村河流橫潰茫無涯際古云桑田變滄海不誣矣

發跡崑崙最上峯匯流奔突勢吞容天關直下無留隘
地軸潛回有定蹤石激浪痕蹲虎豹船經桑罅走蛟龍
欲求縮地忘驚險正恐奇人不易逢

歷下亭臨眺

海子山頭歷下亭
舊時臺榭倚空青
濟南山水多佳麗
工部文章最典型
繞徑落花風瑟瑟
隔牕啼鳥樹冥冥
素琴擬待橫秋月
看取游魚夜出聽

趵突泉

濟南泉有七十二
趵突泉當第一流
山谷幽深開虎穴
水心明白現鰲頭
月升銀海波濤湧
露濕金莖沆瀣浮
騎馬遠來間洗耳
怕聞絲竹沸清秋

過故翰林李慨之天心水面亭遺址

供奉歸來已浪游大明湖上貯清秋
十千美酒傾山雨半百閒身對海鷗
水面風生楊柳岸天心月過藕花洲
自從爛醉吹簫去誰解臨亭汎夕流

題王明府歷下秋興圖

點綴秋容亦費思芙蓉泉上晚晴時
景於佳處煩清賞興到無聲絕有詩
天外好山來隱隱雲邊歸鳥去遲遲
更憐箕踞哦松者多是長安杜拾遺

新秋用贈省中諸友

畫戟森嚴粉署開，沛然靈雨洗氛埃。
數峯晚翠雲邊出，萬斛秋濤樹杪來。
齊魯衣冠逢治日，國家文武萃英才。
欲憑高處舒吟嘯，還憶年時上鳳臺。

梅杖為西霞霍維肅賦

錚錚古幹鏘鳴鐵，拄到西湖淺水涯。
素質可能韜玉潤，溜皮猶自著霜華。
臨風倚竹幽香在，和月敲門瘦影斜。
一段陽春舊清致，等閒來伴老西霞。

東宣城俞用中兼貽郡守

聞君旅寓宣城日絕似拾遺殊可憐瘦蹇騎從官道側
苦吟書徧草堂前孤撐老氣陵巖武特立貧交許鄭虔
郡中况有賢知己應是時時送酒錢

詔下諭平幽薊兼喜復唐時衣冠

日射卿雲擁建章內官催謁籛鴈行已聞河朔平全薊
更喜衣冠遇盛唐露奏定隨丹鳳下天書猶帶紫泥香
朝回花底鳴珂珮不特凌烟獨有光

奉旨行冬至朝賀禮

寶扇初開雉影圓
難人唱徹聽臚傳
兩京雲集千官擁
萬國春從一氣先
酒進玉杯承湛露
樂當金闕奏鈞天
小臣際遇漸無補
願擬南山頌萬年

自壽

腐儒今年四十二
幸當堯舜聖明時
堂中白髮慈親健
膝下紅顏二子奇
竹葉香浮春拍拍
棗花輝映日遲遲
寸心為國雖無補
不愧皇天后土知

梅信

雙江十月尋君處記得巡簷索笑歌往事依稀常在念
暗香消息近如何閒憑南鴈傳冰雪試扣東風向薜蘿
來復定期當七日政緣驛使寄聲多

梅魁

纔聽東風第一聲狀元高出冠羣英冰霜歲月殊先得
桃李園林取次榮春到玉堂傳視草香凝瓊宴賜和羹
御溝楊柳含青眼應許樊兄是老成

曲阜縣

拜軒轅少昊墓於郭外謁先聖廟於魯城遂
與衍聖公孔士行歷郊原披荆棘訪周公廟
址靈光殿基於荒烟杳靄間及觀顏子廟望
孔林蒼翠藪蔚使人悲感交至不能自己於
懷乃賦詩紀所見云

狐兔縱橫走夕陽斷籬荒徑入牛羊可憐東魯成焦土
曾是西周奠故疆汶泗尚餘春寂寂龜蒙遙對晚蒼蒼

偶披荆棘懷前古，獨有絃歌思激揚。

立春日過邳州

紅日瞳瞳出海東，扶桑枝上曉雲融。
九農已兆三時業，萬國均蒙一視同。
原鳥飛鳴乘淑氣，隄楊搖曳受和風。
古邳城下河凌積，誰俾銷沉頃刻中。

夜過寶應縣

滿湖風浪拍隄沙，雪壓黃蘆沒釣槎。
卧聽隔船歌白苧，起來和月岸烏紗。
故鄉近別無多地，歸夢應知已到家。

何日弟兄攜子侄海天烟雨藝桑麻

曉過高郵喜鄉人迎餞

賀監南歸酒正香一斑纔露鬢毛蒼
最憐傾蓋逢知己曾敢揚眉過故鄉
風約凍雲開野色月兼晴雪動湖光
舊時親友多零落長是教人憶斷腸

過河陰觀楚漢遺壘

鴻溝在縣南接汜水
東有楚城西有漢城

廣武山前望虎牢淡烟衰草沒城臯
鴻溝豈限長江險楚壘何如漢壁高
此日登臨悲鳥道當時南北混鯨濤

河陰老樹森幢蓋猶似鑿輿駐白旄

過杭州覽古

湖江亭下水如苔曲几閒牕面面開山勢不移天闕在
潮頭偏逐海門來梅從和靖祠前見柳繞蘇公隄上栽
知是國初全盛日滿城絲竹沸樓臺

鳳池吟稿卷八

欽定四庫全書

鳳池吟稿卷九

明 汪廣洋 撰

三言詩

短歌行贈別一首

歌停雲酌春酒送君發為君壽彈青萍鼓素瑟何以贈
雙白壁車兒膏馬兒秣時載陽鳴鶴鵠戒僕夫肅徂征
陟遠道揚飛旌慰爾民崇爾德君子心我無忒

四言詩

采薇

甲午春渡江館於姑熟潘氏東軒作詩以寓意耳

采薇采薇山高路危采之盈掬聊以充飢薄暮無人踣
踣獨歸其歸伊何路遠莫致焉得羽翰乘風而去念我
母氏懷我兄弟日月遄邁其如憂悴翩彼晨風集于藜
木載飛載鳴載生載育人故不能而罹惇獨用作是歌
以寫心曲

五言絕句

對竹

我家湖水上長與竹為隣
今夜月明裏相看如故人

挾彈圖

宮樹已聞鶯王孫挾彈行
金丸非愛惜為爾好音聲

寫興

彭蠡驚濤急匡廬積翠重
東林瀟洒地只合卧雲松

太華奇蹟三首

仙人白玉掌半出五雲間
好去尋芝草移栽王屋山
華岳萬年松盤盂小可容
清冷一勺水蒼翠起蛟龍

玉井落青天，天開五色蓮。自從采華實，又是幾千年。

贈孫炎

建業孫公子，文如李謫仙。江頭看明月，醉枕酒鉗眠。

灘行五首

花底住鳴鞭，曉行灘上船。上流風較穩，百丈不須牽。
上峽灘水急，下峽灘水平。隣船夜相語，兩日到嚴陵。
聞道沙溪酒，春來如蜜香。買將千百斛，取醉到東陽。
灘上水平沙，梭舟蕩落花。吳儂不相識，對面浣春紗。

三百六十灘相逢相見灣舟師憐遠客數問幾時還

過吳城山

夜過吳城下不眠閒倚牕溯流雙櫓健搖月下西江

觀後堂秋燕

喃喃若為語栖栖猶戀巢烏衣故鄉近好去莫辭勞

灘行五首

灘行逆上船楊柳畫橋邊正恐風湍急將百丈牽
雲壑生清籟松蘿掛紫烟沿流待月出徐放賀家船

章貢水流急舟行不覺寒
權郎烟雨外爭折小桃看
上灘如上天曾買越溪船
倚權閒追憶於今第六年
灘水粼粼碧蒲芽短短青
僕夫忘記念却道過嚴陵

江上

昔從江上去今從江上還
家僮笑相語又過小孤山

大港口

夜宿大港口月林聞露蟬
穩拋船尾纜莫近淺沙邊

雪中渡河

薄霧寒容慘殘年歸思多南京親舍遠衝雪過清河

過鴈門有感

淋漓杯酒邊虎跡出龍泉神物終呵衛將門四百年

五花澗

桑麻生暝烟沙磧露晴雪盡日不見人涼蟬自嗚咽

過池陽三首

山空雲氣收風定水聲歇
雙髯發短歌輕舟蕩斜月
放舟秋浦月揚舡秋浦風
年年遠行邁往來秋浦東

每思貴池魚曾涉貴池水美人不招來松柏秋風起

畫虎

虎為百獸尊罔敢觸其怒惟有父子情一步一回顧

夕景

水樹和烟生人家傍沙語孤帆何處來驚覓去如雨

六言絕句


山行

溪光靜如白練山色碧似朝霞最是一春好處雨晴人

採新茶

讌會清堂

勝日大開東閣臨池旋取鮮鱗只為梅花合醉不須
雨留人



鳳池吟稿卷九

欽定四庫全書

集部

鳳池吟稿卷十

詳校官中書臣呂光復

中書臣劉源溥覆勘

總校官中書臣朱鈞

校對官中書臣牛稔文

謄錄監生臣沈世攻

欽定四庫全書

鳳池吟稿卷十

明 汪廣洋 撰

七言絕句

過叢山闕觀孫炎題壁

空翠深深啼竹雞，叢山塞口日沈西。
數行大字光如漆，知是孫炎醉後題。

句曲山中

聞說昌陽可引年，便從句曲種秋烟。
茅家兄弟如相識，

贈我明珠百顆圓

汪口渡捕魚者

芳草渡頭歌竹枝晴天小艇放鸕鷀
比鄰為報春醪熟
自起持魚貫柳絲

宿寧國山家

夾路蒼松鎖暮霞滿溪流帶寒沙
荆扉不掩雲長住
此是山中靜者家

蘇溪亭

蘇溪亭上草漫漫誰倚東風十二闌燕子不歸春事晚
一汀烟雨杏花寒

送僧歸越中二首

白下門前黃葉飛楚人來送越僧歸遙知到日春初暖
應是霜林筍蕨肥

越中舊識梁開士說法曾無一語聞惟有手培雙樹在
至今蒼翠倚秋雲

贈張巨源老人

髣髴素髮僅垂領
落落老懷殊過人
七郡江山宛如故
有誰曾不受風塵

山行三首

前村後村溪水洄
大樹小樹梅花開
一雙野鶴避人去
四壁雲山傍馬來

米家圖畫不易得
今日見山如見之
偶上層巒縱游目
不知駐馬已多時

曾聞東掖郎官說
七郡好山如米多
松風吹衣水流急

疑在王官谷裏過

再過江陰觀錙琪寫竹

錙琪素得洋州譜寫竹真如寫草書尚憶澱江舊游地
雨中燒筍食鮒魚

臨溪橋

面面溪山小畫圖山行不盡翠模糊深林遺廟知誰祀
烟雨東風啼鷓鴣

臨溪橋畔柳毵毵橋下溪流碧似藍烟雨畫圖行七日

不知春夢繞江南

石磴盤盤卧濕雲
山深瑤草不知春
馬頭忽見梅如雪
縱有輕寒不著人

空谷無人響暗泉
隔溪茅屋見炊烟
東風故遣飛花出
知是桃源別有天

宿寧國縣

寧國城中聽雨眠
元龍樓閣半青天
翻疑句曲山中夜
萬壑松濤落枕邊

遊金華山三首

空翠盤盤下鶴羣
仙家雞犬靜中聞
東風忽遣廉纖雨
吹落松梢幾片雲

玄都靜者學仙處
說在金華小洞天
偶憶騎鯨滄海去
石田瑤草自年年

濕霧空濛啼畫眉
滿山黃竹雨垂垂
隔溪亂石如羊白
想是初平去後遺

夜過叢山關

山黑怕聞猿嘯哀
闔門魚鑰報重開
健兒把燭更深立
爭道前年使客來

宿井山廢寺四首

一井深藏數百家
半宜榛栗半宜茶
可憐兵後誰為主
唯有長松寄宿鴉

四壁雲山擁翠屏
上方零落鎖寒扃
祇緣喪亂無虛日
顛倒琅函貝葉經

澗水泠泠響石溪
舊時亭館半高低
杜鵑儘有傷春淚

啼到山深不忍啼

破屋哀哀啼老孀祇因兵後又年荒
一家十口存無二
廢盡門前陌上桑

宣城道中二首

雨花臺下承明發盡日王維畫裏行
到此溪山愈幽絕
令人想見謝宣城

萬壑長風吹老髯輕雲時送雨
廉纖暫停候館拈春碧
愛殺春盤野蔗甜

過茶園三首

竹雞花外弄輕烟
桑柘深深雨後天
過客曾聞遠人說
嚴州風土半宜綿

打鼓發船灘上去
健兒羣立候晴暉
明朝又是嚴陵道
無數青山尚客衣

讀陳都事贈術士鐵硬斷詩用韻

新逢逆旅酒家仙
濯足常揮子母錢
袖得元龍詩句在
數行行草似張顛

醉中往往賦巢雲顛倒林宗折角巾却喜老懷多放逸
敢將竒語動時人

歛中右族老雲孫半百年來住鹿門三日山城好風雪
可能來訪浣花村

席中用趙子常詩韻贈魯志敏

白髮近如春草生可恨十年成底名雞鳴拔劍背燈舞
風雨草堂銷客情

山城駐馬四十日斗酒日飲飛將軍龍居近報有鳴鳳

詎可不往求一聞

龍居地名也

紫陽隱者卧瀟鶴大雪閉門書獲麟魯連高誼在老眼
極意放歌俱絕塵

過浦江縣

官樹冥冥啼早鴉雨晴山縣蹋春沙誰家故宅無烟火
一葉松扉鏤落花

與唐德昭論舊

新聞湖上春水生可慣蘭州載酒行偶遇鄉人論舊事

小窓晴日坐聞鶯

又

春風吹花落客愁湖上酒家多起樓醉斫鯉魚歌白雪
翻憶十年曾此遊

題宋徽宗雙鴛圖

蘆葉青青水滿塘文鴛晴卧落花香不因羌管驚飛起
三十六宮春夢長

寫興寄諸友

小字蠅頭枉費辭祇將田賦較公私秋風江館聞雞起
不是青綾夜直時

版籍披尋百兩餘職方諸史進徐徐不眠終夜坐風雨
爭似揚雄校魯魚

寒食過桃花潭觀拜掃者

桃花潭上錦糲糊號泣青天海欲枯愧我親塋在淮土
五年不得洒松醑

東朱伯徽

紫陌山下朱徵士白髮近來垂滿肩
清晨拄杖出門去
為斲昌陽求引年

隱君縛屋萬山幽一日不見如三秋
閉門高枕了世事
肯信人間有列侯

秋思

黃牛洲前黃葉飄
棹人歌斷浦雲遙
柳枝絡馬間居士
憶著揚州廿四橋

聞歌

江上草色碧纖纖我獨近來華髮添誰人唱歌多古調
莫是當初昔昔鹽

毗陵道中二首

四境荒涼半是營百年憔悴幾麾兵獨騎瘦馬長吟者
落日蕭蕭過呂城

塵合官橋雪作沙落殘楓葉見梅花短籬破宅臨流水
狼藉毗陵賣酒家

江上十首

廬山萬八千丈高江水日夜送波濤看山飲水自成趣
何用長竿釣巨鰲

大山小山松樹齊千聲萬聲子規啼攬衣起舞夕露下
三更月落吳城西

褚磯口濶浪如山官船客船前後灣明日天晴大家喜
看我鼓枻中流還

象牙灘上百花開參差時復見樓臺翠香芹菜綠沙出
雪色鮪魚上水來

大姑廟前花草香
女兒港口江水長
江水江花思無限
目斷鞋山又夕陽

江上四月雨綿綿
連日北風何太顛
且買活魚炊晚飯
皖城對岸泊歸船

英英白雲多在山
媿我幾曾如此閒
贛江東下數千里
祇許拏舟十日還

蛾眉今日為君開
一色青天絕點埃
浩想往年經濟事
赤龍風雨過江來

昔曾將命解戈鋌一客雙江又二年
瞻望蓬萊雲咫尺
寸心長繫片帆前

內班清切侍金鑾深媿無能負好官
萬里長風開霽色
舉頭紅日是長安

梅花圖

贛江去國數千里曾對梅花憶故人
今日歸來看圖畫
一枝寒玉更精神

百舌

簧舌琤琤巧萬端轉令聽者覺多般爭知阿閣春風裏
曉日嗳嗳語鳳鸞

望梁昭明松林

兩江笳鼓競分爭城郭全非草樹平十里茂林無恙色
貴池今日祀昭明

寄王益

獨立汀洲采白蘋暖風晴日正愁人江東倘有平安字
早晚攜書願卜鄰

寫興

謝豹花開滿嶺紅
空濛曉雨濕春藜
看山不盡行人意
處處東風啼郭公

江上十首

戊申夏奉
名回京

月射汀沙如雪明
野禽驚聒草虫鳴
叮嚀今夜看風水
且放官船著岸行

歸路貪行不覺多
館夫連日棹江波
滿船爭唱湖州調
兩岸雲山側枕過

小姑南岸對彭郎天劈雲崖峙兩傍日暮驚濤沒沙尾
江流較比去年強

吉陽泖裏採魚舟採得鮮魚為日謀倘見官船忽撐去
却如鳧鴨不回頭

順風全不費篙牽把柁沿江穩放船指點大龍山色近
皖城只在水雲邊

李陽河畔有人家鷺鴨雞豚聚淺沙應是久居生計熟
大張濶網取魚蝦

櫂歌齊發浪聲喧池口東邊又換船
秫酒發醅偏醉客
鮒魚出網不論錢

大通港口柳如烟簇簇人家賽輞川
候吏頗諳巡邏事
插旗搥鼓送行船

王事方殷敢後程抗舟力與北風爭
烏紗港裏檣如棘
直待波平自在行

牛渚磯頭江月明倚歌閒答洞簫聲
夜涼老子興不淺
自把濁醪時一傾

兩梁山

采石蛾眉亭
正望北山

兩梁雄跨大江湄
高出雲霄控碧漪
天遣騎鯨人去後

淡烟恒似鎖蛾眉

慈湖磯

溪山素與人事絕
勝地何緣得美名
大抵一誠能格物
昆蟲草木總為榮

慈湖磯上白雲飛
慈湖磯下游子歸
祇為年年事奔走
寸心何以報春暉

次清河縣

淮河流汨汨清到縣都無二里程兵後人家頗相得
採魚屯種日為生

過臨濠十八里灘

宋太祖戰
勝於此

蘆荻蕭蕭吹晚風白沙如雪陣雲空翻思宋祖麾兵後
百二山河破竹中

峽石口

斬斷靈鼇劈兩崖湯湯淮水自西來信非天遣神工助

大禹何緣鑿得開

次定陶縣

滔滔急水來西北落落飢鴛噪晚晴井邑已荒民物盡
行人猶辯定陶城

偶題主敬陶叅政所論詩經小序後

二十年前絕可嗤逢人啜啜便言詩只今羞澁無多語

政恐門前匡鼎來

音梨

前賢已往後賢來掇拾遺編要釋疑便使李黃今日在

也須三嘆有餘師

詩從刪後更無詩
美刺還他熟慮思
若止誇多名物辨
古人餘憾不無遺

大手文章不費辭
眼明理到自無疵
客憲三復忘休寢
細酌清泉夜半時

濟南八月一日聞鴈

若無高閣送晴暉
翰翰階前柿葉稀
我有慈親在京國
憐渠一一向南飛

山中清隱圖

王屋山前雲氣多濯濯水流幽澗阿青松白石有如此
歲久不歸生薜蘿

題徽宗御製小景

夢覺涼生水殿秋起拈毫素寫滄洲西風底故無情思
吹得黃蘆也白頭

書綿萐圖後

鼎沸纔清席未温肯將禮樂奏君門後來牽合虛文者

未必無疑到叔孫

扶植綱維明大節折衝俎豆去繁蕪
今人健羨麒麟畫
曾及當時斫柱無

朱伯徽自溪南攜酒至婺源山中兼示垂絲海
棠醉中求賦七言

一自朝雲委路岐春風吹夢托游絲
內家叢裏分明見
彷彿盤旋立舞時

東家蝴蝶愛悠揚不肯輕飛過短牆
賸買麝煤千百斛

暖薰濃抹到沉香

舞罷霓裳不奈嬌
口脂微動酒初潮
玉闌西畔春如海
擬倩東風整翠翹

使關中經過鴻溝

在汜水縣西

一雙秋水佩吳鉤
百二山河屬壯遊
往事消沈遺跡在
斷鞭斜日過鴻溝

曉度關山

嶺頭叢木碍烟扉
石角枯藤掛客衣
杜宇為誰傷遠別

滿山都道不如歸

夜泊揚子橋

揚子橋頭夜泊船
水波纔定月初圓
不眠細數經行日
笑隔東風又一年

過虎牢關

袞袞河流隔太行
盤盤關路接滎陽
曹瞞已去溫侯死
贏得悲歌古戰場

過潼關喜得長安

關陝喉襟在必爭一呼誰敢抗前旌
華陰父老頭如雪
解道黃河此日清

函谷關

樹木陰森虎夜號行人愁殺路峽嶮
誰家雞唱寒烟裏
舉首東方太白高

老君谷

老君谷裏無人到雲氣上天成鶴飛
落日長風飛過雨
萬松深處有龍歸

遊玄都觀

曲江東畔柳絲長
金碧樓臺耀夕陽
惆悵種桃人已去
更從何處問劉郎

遊開元寺

咽咽山胡噪
古槐陰陰香積鎖
空齋翻經臺上無人到
不見天花下寶階

重遊華清宮

霧旆霓旌去不來
陰廊風雨長蒼苔
宮前只有閒花木

還向驪山脚下開

長安曉起聞鶻

簾幙輕風度早春
樹枝乾鶻噪清晨
若非邊報收遺寇
定有家書寄遠人

再過峻關

盡說峻陵路最艱
一年猶得兩回還
姚崇片石孤撐立
寂寞蒼烟杳靄間

寶雞縣

渭河霜滿水如苔一縣人家半草萊
唯有秋風酸棗木
淡烟深鎖關雞臺

宿益門鎮

橫雞嶺木撼清秋關隘連雲控益州
指點烟深最高處
驛程將近草涼樓

過茂陵

落日茂陵衰草寒馬嘶塵起北風酸
可憐此地埋仙骨
不見金莖捧露盤

咸陽道中

五陵原上路漫漫瘦馬行吟日半竿歸思好如南去鴈
強衝風色過長安

月夜過馬嵬坡

關月明明良夜何秋風腸斷馬嵬坡也應不為真妃惜
祇憾當初白骨多

九日觀太白山雪

日日登高賦遠遊偶逢九日轉多愁青山也解行人意

遙對黃花共白頭

過岐山古城

桑柘陰陰蓋甫田
駐車安敢任旬宣
山城父老來相見
尚道周家八百年

過古桃林

氛翳纔消海岳清
萬方誰不願歸耕
北來喜見桃林野
黃犢斑斑暮雨晴

中條山

平沙漠漠草蕭蕭
一劍寧論萬里遙
猶愧未償山水願
暮衝寒雨過中條

曉發睢陽

霜重清寒透紫貂
睢陽城外發行輶
西風滿目蘆花白
疑是秋江上早潮

過北卬山

北卬山上多青楸
北卬山下有荒丘
青楸搖落荒丘在
風雨淒淒狐兔愁

過梅關

春深長憶出秦關
寒擁貂裘馬上還
今日入關春更淺
野花紅白草爛斑

曉發凌江

苦竹坡頭啼鷓鴣
淡烟疎雨暗平蕪
過關喜得江風便
日日推篷看畫圖

黃塘驛

天際孤峯生紫烟
江頭好月向人圓
館夫爭道黃塘近

撾鼓燒燈又換船

湏陽峽

灑面涼風吹酒醒
野猿長嘯樹冥冥
短篷已過湏陽峽
兩岸雲山不斷青

濯溪上

蘭葉青青水滿溪
繞溪花落有鶯啼
天南莫訝無霜雪
二月漸漸麥秀齊

橫石口

江水東流猿夜哀
無人跡到蒼苔
懸崖唯有千章木
時見猿獼抱子來

連江口

舟人云水通湖南

楊柳依依春水生
畫船穩載越中行
白沙黃竹啼雙鳥
相隔湖南又幾程

清遠峽

山酒吹香綠滿瓢
轉回隨峽放蘭橈
年來不奈愁成緒
都與春風付柳條

夜過迴岐驛

亂石灘頭發櫂歌，斷猿啼月夜如何。
白頭司馬青衫濕，應比江州淚更多。

鏢峽

峭壁摩空轉怒雷，江流如束浪如堆。
東風連日桃花雨，葉葉灘船樹杪迴。

登胥江驛亭

小閣開簾望遠岑，暖風晴日轉幽禽。
胥江流水清無底，

較比春愁一樣深

曲江城

曲江門外駐蘭舟
目送行雲獨倚樓
風雨滿城榕葉暗
嶺南二月似三秋

西城鎮

水際漁家星散稀
沙棠艇子漾晴暉
恰如烟外忘機鳥
來去將雛自在飛

登南海驛樓

海氣空濛日夜浮
山城纔雨便成秋
馮唐頭白偏多感
倚遍天南百尺樓

嶺南雜錄三十首

一劍南來兩鬢星
肩輿隨處看丹青
那知庾嶺梅邊客
却上交州海角亭

島嶼潮來日欲曛
聲牙蠻蠻動成群
擘舟盡入沙灣泊
為避犁頭海上雲

海濱朝夕易炎涼
濕氣蒸人沁薄裳
昨日崖州有船到

滿城爭買白檳榔

石鼎微熏茉莉香
椰瓢滿貯荔枝漿
木綿花落南風起
五月交州海氣涼

牂牁流水碧潺潺
潮落潮生草木間
一片海雲吹不起
越人遙指是崖山

春意亭涼酒滿杯
昔人遺刻尚崔嵬
亭前幾樹黃皮熟
日日鶯啼數百回

鴈翅城東湧怒濤
外洋水長蜚船高
莫言昨夜南風急

今日登盤有海螵

吉貝衣單木屐輕晚涼門外蹋新晴相逢故舊無多語
解說邊壚骨董羹

山礪款撞愛喧譁垢面文身到處家試問年年事何事
強弓勁弩舊生涯

倔强馮陵距海垠半為魚鱉半為塵只今編戶聞聲教

遺類何由辨馬人

馬援伐林邑留不去者千戶昌黎詩曰上日馬人來

魚鹽蠻蜚托為生狹路逢人便弄兵見說官曹巡邏急

賣刀買犢也歸耕

誰跨鯨鯢斬斷虹海波飛立瘴雲空閣婆具蠟船收澳
知是來朝起颺風

謾把金釵品價高荔枝端不讓櫻桃若教李白諳風味

甘分南州脫錦袍

陳村有荔枝實大核小其味甘香名金釵子相傳以為昔人有解金釵而得其種

澹白輕紅鬪剪裁紫薇終不占先開如今爛漫炎天裏
賸有春風座上來

番禺南望渺烟波怪底魚龍出沒多頃刻風霆飛白晝

黑龍拖雨過牂牁

南海廟前花草新
波羅垂實雨頻頻
遐荒只愛求奇氣
兩兩來看種樹人

雲色蠻牋傲薛濤
斗南樓上海天高
都將陸賈千年事
付與江淹五色毫

涼風吹雨海門來
一洗蠻烟瘴霧開
回望帝京家萬里
懶教人下越王臺

花覆禪房刻漏遲
妙香浮動碧蓮池
月明風細菩提落

想是南能出定時

海上安期去不來石門花落又花開
幾時相約騎黃鵠

爛醉秋風玉鏡臺

臺在
潛江

白雲山上白雲飛騰達年來與願違
鶴髮慈親應記憶
嶺南遊子幾時歸

嘯彈長缺出秦川又入蠻鄉掃瘴烟
寄語鳳凰臺上客
別來五見月團圓

榕樹陰陰集暮鴉竹深人靜似仙家
芭蕉小苑垂雙實

茉莉南州壓萬花

玉液池邊夏木青
石屏臺上晚風輕
道人心靜不知暑
默坐焚香待月明

越鹽如雪賽吳鹽
諸嶺初肥竹筍甜
何事眉山蘇太守
只將雙螯較團尖

羅浮山下葛洪家
遺履軒前尚種花
鄧嶽早能參妙契
也從勾漏覓丹砂

村園社日喜晴和銅鼓齊敲唱海歌都道一年生計足

五收蠶繭兩收禾

海隅風俗似朱陳嫁娶從來只近隣
椰子檳榔供納采
祖孫頭白每相因

不輸租稅不憂貧縛屋邊崖淺洞人
爭捕蚶蛇邀遠客
旋澆糟粕送比隣

蠻落人家厭食魚兒孫生長不知書
枕椰滿種綠山邏
翡翠新收越海墟

涼州曲

琵琶初調古涼州萬壑風泉指下流好是開元無事日
玉宸宮裏按新秋

登清遠峽飛來寺四首

暫擬蘭舟訪隱淪子規何事勸行人滿山松柏雲來往
誰道王維畫逼真

入峽陰陰出峽晴峽流端似鏡般平玉環玩世誰收得
萬壑千岩月自明

纔到生公講後經蛟龍夜出石潭聽驪珠正照維摩室

優鉢花香蘭葉青

幾年不上雨花臺
勝景尋常入夢來
如此江山好樓閣
峽中圖畫自天開

樵逸詩二首為徐徵士賦

石室棋殘鶴夢醒
自添沈水註茶經
山中歲晚知無事
還傍松根斫茯苓

手把枯桐倚綠蘿
白雲深處少人過
春風一曲猗蘭操
應是牛山美木多

竹枝詞三首

澗水泠泠清見沙
妾心如水平諒無他
願言莫學楊花薄
一逐東風不戀家

守近東窻弄玉梭
織成澗幅翠絞羅
殷勤持贈裁春服
莫遣纏頭買笑歌

三百六十灘水清
桃花春漲近來生
催歸不待臨岐語
昨夜子規啼到明

淳安棹歌二首

淳安縣前江水平
越女唱歌蘭葉青
山禽只管喚春雨
不道愁人不願聽

鏡裏青山畫不如
臨溪日日望郎書
數間茅屋住近水
十個松舟時打魚

東吳棹歌四首

太湖茫茫水拍天
吳儂只慣夜行船
竹枝敲罷燈將滅
風雨瀟瀟入未眠

艇子搶風過太湖
水雲行盡是東吳
阿誰坐理青絲網

遮得松江巨口鱸

玻璃冷浸洞庭山
霜竹攢攢橘柚斑
垂髮吳娃笑相語
官船不似釣船閒

畫槳經過碧浪湖
水晶臺閣翠雲鋪
藍田空老王摩詰
肯信江南有畫圖

蘭溪棹歌三首

涼月如眉掛柳灣
越中山色鏡中看
蘭溪三日桃花雨
夜半鯉魚來上灘

野鳧晴躡浪梯平越上人家住近城
落葉裹魚來換米
松舟一箇似梭輕

棹郎歌到竹枝詞一寸心腸一寸絲
莫倚官船聽此曲
白沙洲畔月生時

舟次濛濛

濛濛灘頭六七家野蒿成樹竹如麻
兒孫不解躬耕耨
日日烟波理釣槎

夜過寶應驛

短篷風急雨聲多
濃墨堆雲水拍河
坐久不聞鐘鼓報
向人數問夜如何

晚過清河驛

溯流西望渺如煙
黃帽齊將百丈牽
日暮雨來風浪惡
隔河槳鼓換官船

鳳池吟稿卷十

鳳池吟稿原跋

汪先生當草昧之初力挽宋元舊習為明朝詩學正宗所著鳳池吟稿膾炙人口不啻夜光和璧嘗考儲文懿集中有寄葛庭光侍御書云承惠鳳池吟稿汪公名迹久湮聞於後者賴有文字之懿自非執事表章先哲則并此集散失之矣甚盛舉也忻忭忻忭但僕所得抄本后集有胡仲子標註末有三序聞前集亦有標註惟今閣老丘公家所收本有標註不可並得但此三序不可

不刊謹錄上乞付之梓也余查葛公以成化十四年登
曾彥榜進士弘治初年始改山東道御史其刻先生集
正此時也至今上改元纔七八十年耳勿論板刻弗存
即印本亦不多見先君子嘗以藏本示不佞兄弟曰楓
落吳江冷其誰能追後死者之責乎手為校訂將欲就
梓而條捐館舍留之篋中又二十年矣然其集全無序
文亦不分前後字樣不知果即侍御刊本否耶儲公所
寄三序豈竟未付之梓耶抑已梓而今復失之耶余向

過海陵訪求抄本於柴墟先生諸孫而竟不可得其扼腕可勝道哉今年秋李孝廉襄素從焦弱侯太史家覓得廣右刻本前有宋承旨一序蓋先生嘗左遷於此故廣中亦有是刻也因相與兌閱更訂二十四字以付剞劂九原有知亦庶幾少慰先人之初志矣至若考求舊序及胡公註本則尚有望於博物君子云丁巳穀日後學王百祥仲善父謹跋

--	--	--	--	--	--	--	--	--

辨疑

吟稿中有題虎絕句曰虎為百獸尊固敢觸其怒惟有
父子情一步一回顧嘗閱殿閣名臣記及灼艾集皆以
為解大紳學士之作且云成祖素不喜仁宗學士蓋借
虎為喻卒之前星克耀此詩之力也其言似若有據然
余考之學士集中絕無此作別有題虎七言一首曰老
大玄文壓舊斑蕭蕭藜藿滿空山明朝再入麒麟隊坐
與君王鎮九關使前詩亦出解手刻中當并載之何獨

遺也今按學士之詩亦自有諷意豈當時所指者即此作而誤書汪詩耶抑學士當時曾並舉汪詩以為諷而後人遂誤傳為學士詩耶不然則洪武三年汪公已進封忠勤伯而集亦刻於是年至二十一年學士始成進士相去不啻數十年矣安得預有此詩而汪公掠其美耶觀吟稿序文出自濂溪宋公之手彼時同居館閣間見必真豈亦未之察耶即如國朝館課刻有汪公白鴈詩一首而集中實無此作先君子嘗手自校訂而白鴈

詩不收入咏虎詩不刪去故集中無見獨恨趨庭時未
及面証耳吟稿久無善本更欲付之梨棗恐耳食者不
察將令汪公之疑不白於天下後世矣因辨之如此後
學王百順謹識

